

आकाशवाणी

खबरां प्रोमिला जम्वाल कोला

Evening Dogri (NSD) News Bulletin 25-April .- 2026

खास-खास खबरां

- पच्छिम बंगाल च असैम्बली चुनाएं दे दूए ते खीरी मरहले लेई चुनाव प्रचार जोरें पर ऐ। बक्ख-बक्ख सियासी पार्टियों दे सीनियर लीडर पूरे राज्य च रैलियां कड्डा रदे न।
- सरकार नै आखेआ ऐ जे मुल्खै च रसैनी हैलें दी उपलब्धता बथेरी ऐ। जेड़ियां रिपोर्टां एदी कमी दी गल्ल करदियां न ओ निरादार न ते वास्तविकता कोला दूर न।
- अर्थ शास्त्री अशोक कुमार लाहिरी होरें गी नीति आयोग दा उपाध्यक्ष नियुक्त कीता गेआ ऐ।
- CDS अनिल चौहान होरें अमरीका दे पैसिफिक ब्हाई सेना कमांडर जनरल कैविन बी.शनिडर हुंदे नै मीटिंग लाई।
- संयुक्त राष्ट्र नै चरणोबल हादसे दे 40 बरे पूरे होने पर परमाणु ऊर्जा दे शांति आले ढंगै सिर इस्तेमाल करने दा आह्वान कीता ऐ।
- भारतीय मौसम विभाग नै अज्ज उत्तरी भारत दे केंइयें इलाकें च सख्त गर्मी पौने करी अलर्ट जारी कीता ऐ ते उत्तर पूर्वी राज्यें च भारी बरखा दी पेशनगोई कीती ऐ।

<><><><><><>

WB –Campaigning

पच्छिम बंगाल च दुए चरण दे विधानसभा चुनां लेई प्रचार जोरें पर ऐ। इस गेड़ तैहत 29 अप्रैल गी वोट पाए जागंन। भारती जनता पार्टी दे बड्डे नेता पूरे राज्य च रैलियां करा'रदे न। केन्द्री गृह मंत्री अमिता शाह होरें पूर्वी बरदवान ते हाबड़ा च अज्ज रैलियें गी सम्बोधित कीता। मगरा उ'नें हाबड़ा ते दक्खनी कोलकाता च रोड-शो कीते।

सेहत मंत्री जे.पी. नड्डा होरें बी पूर्वी बर्दवान ते नदिया च रोड-शो कीता- जिसलै के उत्तर प्रदेश दे मुखमंत्री योगी आदित्यनाथ नबद्वीप पुजे दे न। भारती जनता पार्टी दे राश्ट्री अध्यक्ष नितिन नवीन होरें अज्ज बारानगर च इक रोड-शो कीता। अपनी इक सोशल मीडिया पोस्ट च उ'नें आखेआ जे राज्य अपनी परानी शान बहाल करने गी भ्लेआं तयार ऐ ते डर आहली सियासत गी फैसलाकुन तरीके नै नकारोग।

पच्छिम बंगाल दे विपक्ष दे नेता सुवेन्दु अधिकारी होरें मुखमंत्री ममता बैनर्जी ते दुए तृणमूल कांग्रेस दे लीडरें पर भ्रष्टाचार ते तुष्टीकरण आहली सियासत करने दा दोष लाया। असम दे मुखमंत्री हिंमत बिसवा सरमा होरें चुनाएं च भारती जनता पार्टी दे बेहतर प्रदर्शन पर पूरा विश्वास जाहर कीता। इक प्रैस कांफ्रेंस गी सम्बोधित करदे होई उ'नें आखेआ जे भारती जनता पार्टी असम ते पच्छिम बंगाल च बड़ी जित्त हासल करने आहली बत्ता पर अगड़े बधा रदी ऐ।

दुए पाससै तृणमूल कांग्रेस दे लीडर कुणाल घोष होरें दावा बन्नेआ ऐ जे उंदी पार्टी नै पच्छिम बंगाल दे असैम्बली चुनाएं दे पैहले गेड़ च बेहतरीन प्रदर्शन कीता ते तृणमूल कांग्रेस राज्य च परतियै सत्ता च औने लेई तयार ऐ। कांग्रेस लीडर ते लोकसभा च विपक्ष दे लीडर राहुल गांधी होरें बी अज्ज श्रीरामपुर-हुगली- शहीद मीनार कोलकाता ते मेटियाब्रुज च रैलिएं दा सरिस्ता कीता। तृणमूल कांग्रेस दे लीडर अभिषेक बैनर्जी होरें अपनी पार्टी दे मेदवारें दे समर्थन च बसीरहट ते Canning West च रैलियें गी सम्बोधित कीता ते मगरा बाली च इक रोड शो दा आयोजन बी कीता।

<><><><><><>

Govt. Fertilizer

सरकार नै फही पक्का कीता ऐ जे मुलखै च रसैनी हैलें दी दस्तयाबी च कोई कमी नेंई ऐ ते उंदी स्थिति तगड़ी ऐ- स्थिर ऐ ते ओदा प्रबंधन बेहतर तरीके कन्नै होआ करदा ऐ। सब्बनं बड्डे रसैनी हैलें दी उपलब्धता जरूरत थमां बड़ी मती ऐ। रसैन ते रसैनी हैलें आलें मंत्रालय नै अपने इक ब्यान च आखेआ जे हाल च रसैनी हैलें दी उपलब्धता च कमी बारे बन्ने गेदे दावे वास्तविकता पर आधारित नेंई हैन। उनें आखेआ जे हाल च तयार होई दी 2025-2026 आली रबी दी फसल बाढ़ै करदी ऐ जे रसैनी हैलें दी सप्लाई पूरे मुलखै च बेहतर हालत च ऐ।

<><><><><><>

ED Raids

प्रवर्तन निदेशालय नै पच्छिम बंगाल च अज्ज सार्वजनिक बंड सरिस्ते आले भ्रष्टाचार मामले दे सिलसिले च व्यापक छापेमारी कीती ऐ। कोलकाता- बुरदमान ते हाबड़ा च 9में बक्ख-बक्ख पतें गी निशाना बनाया गेआ ऐ। ए छापेमारी पैसें दे गैर कनूनी तरीके कन्नै लैन-देन आले कनून तैहत कीती जा रदी ऐ।

<><><><><><>

Telangana

तेलंगाना पुलिस दी मौजूदगी च तकरीबन 47एं माओवादियें जिंदे च किश महिलां बी शामिल हियां- अज्ज हैदराबाद च आत्म-समर्पण कीता। ए माओवादी छत्तीसगढ़ दे दक्खन बस्तर डिविजन दे बसनीक न ते उनें DGP शिव-धर रेड्डी हुंदे अगगे समर्पण कीता। उनें 32एं हथियारें कन्नै आत्म-समर्पण कीता। DGP होरें घोषणा कीती जे आत्म-समर्पण करने आलें माओवादियें गी इक करोड़ 20 लक्ख रुपें दे पैकेंज तैहत परतियै रसाया-बसाया जाहग।

<><><><><><>

NITI Aayog

अर्थशास्त्री अशोक कुमार लाहिरी होरें गी नीति आयोग दे उपाध्यक्ष नियुक्त कीता गेआ ऐ। ओ इसलै दे उपाध्यक्ष सुमन के.बैरी हुंदी थाहर लैगन। श्री लाहिरी हुंदे समेत सरकार नै राजीव गुबा- के.वी राजू- गोवर्धन दास- एम. श्री निवास ते अभय कर्णडिकार होरें गी नीति आयोग दे फुल टाईम सदस्य नियुक्त कीता ऐ। श्री लाहिरी उत्कृष्ट नीति निर्माता न ते एदे शा पैहले ओ भारत दे 12में मुख्य आर्थिक सलाहकार दे ओहदे पर बी रेही चुके दे न। ओ 15में खजाना आयोग दे मेम्बर बी ऐ हे। उनें विश्व बैंक ते अंतराष्ट्रीय मुद्रा कोष जनेह अंतर राष्ट्रीय संस्थानें च बड़े ओहदे पर बी कम्म कीते दा ऐ। ओ दिल्ली स्कूल ऑफ इकनॉमिक्स- एशिया विकास बैंक ते NIPFP जनेह नीति बनाने आले बड़े इदारे च बी कम्म कीते दा ऐ।

<><><><><><>

Sitharamam

केन्द्री खजाना मंत्री निर्मला सीतारमण होरें आम आदमी लेई के.वाई.सी. प्रक्रिया गी सखल्ला- डिजीटल ते सुरक्षित बनाने पर जोर दिता ऐ। उ'नें आखेआ कि आम नागरिक गी हर माली सेवा लेई बार-बार वेरीफिकेशन यानि जांच-परख आहली प्रक्रिया चा नेंई लंघना पवै। अज्ज SEBI दे 38में स्थापना दिवस दे मौके पर अपने सम्बोधनै च निर्मला सीतारमण होरें आखेआ कि इक ऐसा एकीकृत KYC सरिस्ता कायम कीता जा- जेहदे च सांझे KYC नियम विकसित कीते जान- जेहडे सब्बनें माली उत्पादें- बैंकें- शेयरबजार-बीमा वगैरा लेई कम्म करन ते इंदे सारे क्षेत्रें च इक्क बारी कीती गेदी KYC प्रक्रिया लागू होऐ तां जे लोकें गी बार-बार वैरिफिकेशन आहली प्रक्रिया चा होइयै नेंई लगन पवै। इस दौरान उ'नें कीती गेदी “JAGROOK” नां दी पैहल दी बी शुरुआत कीती।

<><><><><><>

FM- Cyber Attack

केन्द्री खजाना मंत्री निर्मला सीतारमण होरें आखेआ ऐ जे कुसै बड्डे स्टॉक एक्सचेंज डिपाज़िट्री जां बड्डे शेयर ब्रोकर पर कामयाब साइबर हमला समूलचे मुल्खै दे बाजार गी ठप्प करी सकदा ऐ ते नेह कुसै हमले कन्नै नां छड़ा निवेशकें दा पैहा डुब्बी सकदा ऐ सगुआ लोकें दे भरोसे गी बी गंभीर तौरा पर नुक्सान पुजाई सकदी ऐ- जिसी परतियै ब्हाल करने च केंई बरे लग्गी सकदे न। अज्ज मुम्बई च SEBI दे 38में स्थापना दिवस दे मौके पर अपने सम्बोधनै च उनें आर्टिफिशल इंटेलीजेंस पर आधारित खतरे-जियां जे क्लाउडे मायथॉस दा जिक्र बी कीता- जेहड़ा रिवायती साइबर हमले दे मकाबले मता तेज ते खतरनाक ऐ। उ'नें SEBI ते होरनें विनियमित संस्थानें गी मता सौहगा सतर्क रौहने लेई बी आखेआ।

<><><><><><>

CDS Meeting

Chief of Derence Staff जनरल अनिल चौहान होरें अज्ज अमरीका दे पैसिफिक एयर फोर्सिस कमांडर जनरल कैविन बी. शनिडर हुंदे कन्नै मीटिंग लाई। दवै धडें भारत ते अमरीका बश्कार गैहरे होंदे सामरिक सरबंधें दी तगड़ेआई गी फ्ही पक्का कीता ते प्रांतिय सुरक्षा- अमन शांति दी ब्हाली ते भारत प्रशांत ते अगगै स्थिरता गी बनाई रक्खने दा प्रण पाया। दौनें देशें दबक्खियां सरबंधें गी मजबूत करने ते त्रौनें सेवाएं दे तालमेल कन्नै खेत्तर च शांति ब्हाली गी पक्का करने दी गल्ल कीती।

<><><><><><>

Vaishnav Bullet Train

केन्द्रीय रेल मंत्री अश्विनी वैष्णव होरें अज्ज बैंगलूरु च आत्मनिर्भर तेज रफ्तार आली बुलेट ट्रेन बनाने आले इक संयत्र आदित्य दा उदघाटन कीता। आकाशवाणी दे दूरदर्शन कन्नै गल्ल करदे होई उनें

जानकारी दिती जे अगले बरे तक्कर एदा उत्पादन शुरू होई जाहगा। मंत्री होरें औंदे किश म्हीने च बैंगलूरु- मंगलूरु- मडगांव- वंदे भारत रेल सेवा शुरू करने दी बी घोषणा कीती।

<><><><><><>

UNGA Chernobyl

संयुक्त राष्ट्र महासभा नै चनौबिल हादसे दे 40 बरे होने पर परमाणु ऊर्जा दा इस्तेमाल अमन-शांति आहले ढंगे सिर करने दा आह्वान कीता। कल इत्त सरबंध्यै च लग्गी दी संयुक्त राष्ट्र महासभा दी बशेश यादगीरी मीटिंग च अध्यक्ष अनेलीना बसबोक होरें आखेआ जे परमाणु ऊर्जा बशक्क शांति आहले ढंगै सिर इस्तेमाल कीती जा पर एह बाकि दिएं तकनीकें थमां बुनियादी तौरा पर भलेयां बक्खरी ऐ। चनौबिल परमाणु हादसा 26 अप्रैल 19 सौ 86 च होआ हा ते एहदे कन्नै यूक्रेन- बेलारुस ते यूरोप दे दुए हिस्से च Radioactive बिसला प्रदूषण फैली गया हा। 80 लक्ख थमां बी मते लोक एहदे थमां बुरा चाली प्रभावित होए हे। ज्हारां बदे मारे गे ते बच्चें च ल्यूकीमिया जनेहियां जानलेवा बमारियां फैली गेइयां हियां।

<><><><><><>

PM Mann ki Baat

प्रधानमंत्री नरेन्द्र मोदी होर कल 26 अप्रैल बडुलै 11 बजे आकाशवाणी पर अपने “मन की बात” कार्यक्रम राए देश-विदेश दे लोकें कन्नै अपने विचार सांझे करगंन। हर महीने दे खीरी ऐतवार गी प्रसारत होने आहले इस कार्यक्रम दी एह 133मीं किश्त होग। कार्यक्रम दा प्रसारण आकाशवाणी ते दूरदर्शन दे समूलचे नैटवर्क- ए.आई.आर. न्यूज वेबसाइट ते न्यूज ऑन ए.आई.आर mobile app- डी.डी न्यूज- प्रधानमंत्री हुंदे दफ्तर ते सूचना ते प्रसारण मंत्रालय दे यू-ट्यूब चैनलें पर बी होग। हिंदी प्रसारण दे तुरत मगरा एहदा क्षेत्रीय भाषाएं च अनुवाद प्रसारित कीता जाहगा।



Table Tennis JK

जम्मू-कश्मीर दे रित्विक गुप्ता नै देहरादून च आयोजित 17एं बरे कोला हेठली उम्री दी राश्ट्रीय टेबल टेनिस प्रतियोगिता दा खताब जितियै -केन्द्र शासत प्रदेश दा नां छड़ा नांऽ कीता ऐ सगुआं इतिहास बी रचेया ऐ। 87मीं इंटरस्टेट जूनियर ते यूथ नैशनल टेबल टेनिस चैम्पियनशिप च जागतें दा राश्ट्रीय खताब उ'नें अपने नां कीता ऐ। ओ जम्मू-कश्मीर दे पैहले ऐसे खडारी न- जिनें 17एं बरे कोला हेठली उम्री आहली श्रेणी च एह नैशनल खताब हासल कीता ऐ। इस मौके पर जम्मू-कश्मीर खेडू परिषद नै रित्विक गी इस उपलब्धि लेई ममारकबाद दिती ऐ ते आखेआ ऐ कि उन्दी एह कामयाबी होरनें बच्चें ते नौजवानें गी इस खेडू बक्खी आकर्षत करोग ते राश्ट्रीय ते अंतराश्ट्रीय सतह पर जम्मू-कश्मीर ते भारत दा नेतृत्व करने लेई प्रेरणा देग।



Vande Bharat Service

उत्तर रेलवे आस्सेआ जारी इक अधिकारिक विज्ञप्ति मुजब- जम्मू ते श्रीनगर बश्कार सीधी रेल सेवा लेई लम्मा इंतजार 30 अप्रैल गी खत्म होने आहला ऐ। उत्तर रेलवे दे सीनियर डिवीजनल कमर्शियल मैनेजर उचित सिंघल होरें आकाशवाणी समाचार गी दस्सेआ जे प्रस्तावित सेवा मौजूदा “वंदे भारत एक्सप्रेस” दा विस्तार होग जेहड़ी इसलै कटरा ते श्रीनगर बश्कार चला रदी ऐ। तोंआई मुकामी बसनीकें इस गैंह दा सोआगत करदे होई आखेआ ऐ जे इस सेवा कन्नै यात्रिणं गी फायदा होग ते भरोसेमंद कनेक्टिविटी बी उपलब्ध होग- खासकरियै जिसलै खराब मौसम दे चलदे जम्मू-श्रीनगर जरनैली सिड़क बंद होई जंदी ऐ। उ'नें आखेआ जे इस सेवा कन्नै श्रीनगर जाने लेई यात्रा सुगम होई जाहग।

<><><><><><>

Kejriwal AAP

दिल्ली दे कैबिनेट मंत्री परवेज साहिब सिंह होरें दोष लाया ऐ जे अरविंद केजरीवाल तैहत भ्रष्टाचार आम आदमी पार्टी दे ईमानदार सांसदें ते लीडरें गी चुब्बा करदा ऐ। अज्ज नमीं दिल्ली दे पार्टी हैडक्वाटर च इक प्रैस कांफ्रेंस गी सम्बोधित करदे होई श्री सिंह होरें आखेआ जे आत्म सम्मा आले शख्स मते चिर पार्टी च नेही रेही सकदे- उनें दोष लाया जे केजरीवाल होरें दिल्ली दे लोकें गी अन्नाहज़ारें हुंदे भ्रष्टाचार विरोधी आंदोलन दा सहारा लेइयै गुमराह कीता। उनें अपने-आपै गी इक्क आम आदमी दस्सेआ जिस्सलै के ओ ऐशो-आराम आला जीवन जिया रदे हे। एदे शा पैहले आप दे दो-तिहाई राज्यसभा सांसदें पार्टी थमां इस्तीफा दिता ते भारती जनता पार्टी च शामिल होई गे। इंदे च राघव चड्डा- संदीप पाठक- अशोक मित्तल- स्वाती मालिवाल- हरभजन सिंह- विक्रम साहनी ते रजिन्दर गुप्ता शामिल न।

<><><><><><>

West Asia Ceasefire

इज़रायल ते हिजबुल्लाह बश्कार तनोतनी दे चलदे पच्छिम एशिया च राजनैयिक सरगर्मियां बदी गेदियां न। ईरान दे विदेश मंत्री अब्बास अराघची- तैहरान कन्नै महत्वै आहली गल्लै कत्थे लेई इस्लामाबाद पुज्जी गेदे न। एदे कन्नै ए संकेत थ्हांदे न जे ईरान आसेया युद्ध गी खत्म करने लेई ओ अमरीका गी सिद्दे-सिद्दे दस्सने दे बजाए ओ पाकिस्तान गी जानकारी देई देग। ईरान दे विदेश मंत्रालय नै इब्बी साफ कीता ऐ जे वाशिंगटन कन्नै सिद्दे तौरा पर कोई गल्लबात नेंई कीती जाहग। तोंआई ईरान दे विदेश मंत्री अब्बास अराघची नै आखेआ ऐ जे पाकिस्तान च मीटिंगें मगरा ओ ओमान ते रुस

जागंन। अपनी इक सोशल मीडिया पोस्ट च उनें आखेआ जे उन्दा मकसद अपने भ्याल मुल्खें कन्नै दबक्खियां मामलें ते प्रांतिय घटनाएं बारे तालमेल बदाना ऐ।

<><><><><><>

Weather

भारती मौसम विभाग नै अज्ज दिल्ली-हरियाणा-पंजाब ते चंडीगढ़ च सख्त गर्मी दे चलदे यैलो ऑरेंज जारी कीता ऐ। राजस्थान ते उत्तर प्रदेश च कल बी इस्सै चाली दे हालात बने दे रौहगंन। बिहार-तटीय आँध्र प्रदेश ते कर्नाटक- गुजरात-पच्छिम बंगाल दे गंगा दे कंडे कन्नै लग्गदे इलाके-केरल-माहरे-कोंकण-गोआ ते मणिपुर च कल मौसम गर्म ते नमी आहला बने दा रौहग।

तोंआई मौसम विभाग नै अज्ज अरुणाचल प्रदेश-असम-मेघालय-उपहिमालयाई- पच्छिम बंगाल ते सिक्किम च भारी बरखा बरने दी पेशनगोई कीती ऐ।

<><><><><><>